

武岡州志志志

第八冊

卷二
列傳十二
上

卷三
列傳十三
中

卷四
列傳十四
下

列傳

晉伏元度與習鑿齒論青楚人物鑿齒以謂伏羲生於黔中召南詠其美化今甘棠渡在邵州而武岡又古巫黔地也率荒遠無稽今紀其自唐以下見於記載者裒爲一編作列傳

唐鄧處訥宋楊再興列傳

鄧處訥字冲韞武岡龍潭人

唐書本傳載邵州龍潭人其時武岡隸邵陽故稱邵州龍

潭即今之龍潭舖州東一百里

少從江西人閔頊防秋安南中和元年還

武岡州志

卷二十二

列傳

一

道潭州逐觀察使李裕召諸州戍校詢曰天下未定今與君等安護州邑以待天子命若何衆稱善乃推頊爲留後請諸朝僖宗方在蜀遣使者撫慰當是時撫州刺史鍾傳據洪州議者欲二盜相噬卽復置鎮南軍擢頊節度使頊悟不受命更爲檢校尙書右僕射欽化軍節度使以處訥爲邵州刺史朗州武陵人雷滿者本漁師有勇力時武陵諸蠻數叛荆南節度使高駢擢滿爲裨將將鎮蠻軍從駢淮南逃歸與里人區景思獵大澤中嘯亡命少年千人署伍長自號朗團軍推滿爲帥景思爲司馬襲州殺刺史崔

翥詔授朗州兵馬留後歲畧江陵焚廬落劫居人俄進武
貞軍節度使先是陬溪人周岳與滿狎因獵宰肉不平而
鬪欲殺滿不克見滿已據州悉衆趨衡州逐刺史徐顯詔
授衡州刺史石門峒酋向瓌聞滿得志亦集夷獠數千屠
牛勞衆操長刀柘弩寇州縣自稱朗北團陷澧州殺刺史
呂自牧自稱刺史頊既彊大且治人有恩哀徐顥窮率兵
納之向瓌召梅山十峒獠斷邵州道頊掩其營周岳羸軍
誘戰頊墮伏中故大敗淮西將黃皓殺頊岳聞亂以輕兵
入潭州自稱欽化軍節度使處訥聞之哭諸將入弔處訥

武岡州志

卷二十二

列傳

二

曰與君等荷僕射恩若合一州之兵問周岳罪奈何衆曰
善於是礪甲訓兵積八年結雷滿爲援攻岳斬之自稱留
後昭宗詔拜武安軍節度使不三日會劉建鋒馬殷兵至
攻澧陵處訥遣邵州豪傑蔣勛鄧繼崇率兵三千斷龍回
關勛以牛酒犒師殷說勛曰劉公勇智絕人術家言當興
翼軫間今精兵十萬攻必下戰必克不如下之富貴可得
也勛謂然又其下畏建鋒虐夜棄甲走建鋒至關曰此天
意也盡用邵旗鎧趨潭州守者以爲勛軍納之旣入處訥

方宴執而殺之

新唐書處
訥本傳

楊再興賊曹成將也紹興二年岳飛破成入莫邪關第五將韓順夫解鞍脫甲以所虜婦人佐酒再興率衆直入其營官軍却殺順夫又殺飛弟翻成敗再興走躍入澗張憲欲殺之再興曰願執我見岳公遂受縛飛見再興竒其貌釋之曰吾不汝殺汝當以忠義報國再興拜謝飛屯襄陽以圖中原遣再興至西京長水縣之業陽殺孫都統及統制滿在斬五百餘人俘將吏百人餘黨奔潰明日再戰於孫洪澗破其衆二千復長水得糧二萬石以給軍民盡復西京險要又得僞齊所畱馬萬匹芻粟數十萬中原響應

武岡州志

卷二十二

列傳

三

復至蔡州焚賊糧飛敗金人于郾城兀术怒合龍虎大王蓋天大王及韓常兵逼之飛遣子雲當敵鏖戰數十合敵不支再興以單騎入其軍禽兀术不獲手殺數百人而還兀术憤甚併力復來頓兵十二萬于臨穎再興以三百騎遇敵于小商橋驟與之戰殺二千餘人及萬戶撒八孛堇千戶百人再興戰死後獲其屍焚之得箭鏃二升宋史再興本傳志曰唐末羣雄蜂起處訥起自田間建牙列鎮功名之際固運會使然哉觀其眷懷舊恩洒淚誓師與雷滿景思之徒不可同日語矣再興初隸曹成一賊將耳及感

岳公忠義報國之言摧鋒陷陣奮不顧身至於馬革裹屍體無完膚何其烈也再興臨岡人宋史既不詳里居而南蠻傳又但紀其扇亂之迹至其子正拱猶以叛誅豈其時有兩再興與何父子異趣而議功之典初不聞於朝也

宋三周傳

周儀紫陽人少有異稟登雍熙中進士官諫議大夫風骨峭厲遇事敢言居鄉言動必依禮法祖遺田產儀悉分贍族人祀鄉賢子湛自有傳

武岡州志

卷二十二

列傳

四

周湛儀之子登天禧中進士出知襄州襄俗不善陶瓦民廬率剖竹覆之黠者至侵佔官道簷廡相逼火數爲患湛至勘出侵地悉毀撤之又教民搏土陶埴易竹以瓦火患遂息累官夔州路轉運使時雲安鹽井歲賦民薪茅以萬計破產無以償展轉貸責不已湛悉捐之夔襄並祀名宦仕終諫議大夫時稱嘉祐名臣

周欽儀之孫登宣和中進士性剛毅骯髒勇於爲義宣和二年武岡峒獠叛欽單騎往諭羣獠感動相率延至峒中餉以酒肉欽據地飲啖諭以順逆禍福無不感服事聞以

功擢德州刺史金人內逼欽率師勤王死之祀鄉賢

志曰余至紫陽里人爭道周諫議讀書處其上蓋有諫議書院云史稱嘉祐直臣不誣矣湛歷官襄夔跡其行政古稱循吏何以加焉欽單騎赴峒非有守土之責也卒之委贄專城致命遂志其風節蓋見於居鄉矣不其賢哉不其賢哉

元會華傳

曾華字萼叟幼嚴重有識與羣兒戲能以兵法部勒其衆長知兵以從軍官廣東宣慰使僉都元帥府事爲楊完者

武岡州志

卷二十二

列傳

五

部將至正中完者以土兵破走張士誠累官江浙行省參政遣華備浦陽縣華撫恤士卒紀律嚴明兵至士民安堵市不易肆歌舞載道後被檄移鎮一夕卽去不聞人馬聲浦陽人曰使大將皆如曾將軍之紀律何致使吾民暴露於山澤中耶作嘉政祠立石記之宋濂爲文

志曰元季喪亂羣雄競起盜賊充斥所在爲民害者何限楊完者以谿峒土官摧東南強敵而殺戮之慘君子病之曾華爲其部將乃能嚴戢士伍所至之處民不知兵則華之賢過於完者遠矣雖然完者亦人傑也哉完

者赤水人今屬城步故不列州志云

明劉李三趙黃傳

劉必榮字懋德洪武初以明經薦舉

舊志以文學才能舉明史選舉志無文學

才能之目今正之

累官浙江按察司僉事以言事謫歷官寧夏河

渠廣東提舉起鴻臚寺少卿性爽邁多權畧好談兵兼習

四夷譯書通諸國言語洪武二十一年安南國相黎季犛

廢其主陳煒尋弑之立叔明子曰焜主國事仍假煒名八

貢帝怒遣官詰責時必榮奉命出使至境季犛已竄必榮

即促船過東都踰虞江四十八站直抵其穴責以廢立欺

武岡州志

卷二十二

列傳

六

誑之罪季犛懼明年復詭詞入貢

必榮事不見明史舊志所引與史事不合今以

明史安南傳正之

建文元年季犛弑日焜自立更姓名胡一元名

其子蒼曰胡奩尋自稱太上皇傳位奩朝廷不知也成祖

既承大統遣官以即位詔告必榮凡三奉命使其地却其

贖不受又使哈密古麻諸國

舊志作哈麻林西域傳有哈密有古麻麻林西域傳有哈密有

烈諸號時

十六年乞恩乞兒使至

明史西域傳有哈實哈兒乞力麻兒諸號無乞

恩乞兒也考成祖本紀十六年

哈烈沙哈魯撒馬兒宰俱入貢無所謂乞恩乞兒也滿刺加

疑以

必榮復奉命往使其國隨遣使納貢必榮居官四十

二年歷事四朝凡屢使外國皆不辱命祀鄉賢子蒙頤皆

顯蒙舉正統乙卯鄉試歷官吏部稽勲司主事出知寶寧府頤正統中舉賢良方正歷官思明府通判俱以廉介稱

按明史外國傳洪武朝前後使安南者侍讀張以寧主事林唐臣郎中邢文偉永樂朝行人楊渤郎中夏止善御史李琦行人王樞行人聶聰等皆齎勅往返姓名歷歷可覆按也舊志載必榮三使安南俱不見本傳考洪武二十七年五月帝怒季犛遣官詰責却其貢永樂元年遣官以卽位詔告安南俱不言何官必榮之使或在斯時舊志草率撫拾與當日情形迥異今悉以正史正之云

李志道號金城幼聰敏博洽羣書洪武初以明經入太學時太祖加惠儒臣詔擇府州縣學諸生入國子學厚給廩餼歲時賜布帛文綺與科舉薦舉參用志道擢汀州府知府固辭上嘉之賜膳謹身殿乃改判台州有惠政未幾乞歸居家嚴而有法學者稱竹軒先生祀鄉賢

武岡州志

卷二十二

列傳

七

趙漢鎮洪武初舉孝廉方正有至性事親以孝聞官江西轉運同知子才昌應人才舉官應天府經歷廉潔自守勤於其職猶子才富永樂中亦以人才舉歷官交州府同知時安南初內屬蠻人自以非類數相驚恐中朝所置吏或不善撫循甚則以恣虐激變才富蒞任務以嚴惠輯新造性剛直峭厲忠義之氣形於言色上官所行有不當者必固爭之以言事著直聲卒於官昱亦漢鎮族子也永樂中

以貢生官石屏州吏目廉惠洽民隱州人立石頌之卒年九十六歲

黃琬字尙美舉天順己卯鄉試官吏部司務性敏達有守陞刑部員外郎伸理冤獄歲出死罪數十人時日本貢使久不至數出爲寇琬奉使宣諭稱上意未幾乞歸詔免其家徭役時高其行茶陵李文正東陽稱其賢贈以詩

按明洪武中日本屢通貢使後稍驕橫永樂元年遣侍政趙居任行人張洪偕僧道成往修貢如初四年遣侍郎俞士吉往天順初其王源義政欲遣使謝罪不敢自至屢入爲寇五年遣員外郎呂淵等往自是貢使不貢馬殺書朝於市帝赦之自是益無忌歷成化四年乃遣倭

武岡州志

卷二十二

列傳

八

寇遂爲東南大患其時未聞以朝臣出使也琬之使當在何時姑仍舊志書之云

志曰明太祖既定天下詔求山林之士卓犖竒偉德行文藝可稱者有司采舉備禮遣送京師不次擢用而各省貢生亦由太學以進於是薦舉學校得人最盛必榮志道漢鎮父子皆以薦辟起家跡其成就亦一時之傑也黃琬以部郎出使日本與必榮同其事雖不見於史父老傳聞殆不誣云

劉林曹潘傳

劉敬字孟直永樂辛卯舉於鄉辛丑成進士由知縣擢監

察御史與同郡謝宗禮馬郁齊名時稱三御史遷山東按察司副使性剛毅有守不爲利害毀譽所動抑豪強理冤訟有權貴以書請託者敬先按治而後發書焚之不復省覽曰御史爲勢家所屈何以居此官在東省練軍士充糧儲清吏治一時奸民墨吏聞風斂戢以疾告休起都御史宗禮洪武甲子舉人歷官御史巡按廣東政教大洽卒於官宋濂志其墓郁洪武癸酉舉人由知縣擢御史巡按四川以敢言觸忌屢躓不屈俱祀名宦

林璧字庭美天順己卯舉於鄉甲中成進士歷官監察御

武岡州志

卷二十二

列傳

九

史性嚴厲人不敢干以私善斷疑獄活死罪八十餘人以神明稱時中貴家奴有橫恣者璧捕得貂璫昏夜使人啗以重利璧笑拒之而繩奴以法巡按山東轉四川按察僉事陳定蜀六事多見施行時松潘土番仇殺糾結番蠻攻劫地方松茂疊溪所轄白草壩等寨恃其險阻往往剽奪爲患璧分遣官軍相機勦撫邊境肅清晚年休致歸好學不倦號石龍居士著有詩韻補遺祀鄉賢

曹一夔字雙華隆慶丁卯舉於鄉萬歷甲戌成進士授行人擢監察御史巡視山東長蘆等處鹽法條陳十二事□

爲令巡按四川轉浙江嘉湖兵備僉事所至清理積案釐剔奸弊以罣誤去官歸田後築室同保巖之麓鍵戶著書足跡不履城市邑中有利弊必言於當事知州江源達遷復州學皆一夔力也性篤孝博學強記詩古文辭俱有法度與岷憲王定燿岷宗室定灼左史顏廷榘友善唱和成帙著有虛白堂集行世祀鄉賢子鳳翔孫應詔皆官知縣會孫志伊有傳

潘應斗字章辰高祖時文天順中以恩貢官金壇主簿潔己愛民上官嘉其能檄攝金壇縣事表其循蹟薦於朝祖

武岡州志

卷二十二

列傳

十

思彬官貴州長官司吏目能斷疑獄出縣民張嘉紳死罪歸後以讓產聞父一桂有傳應斗生有異稟舉崇正丙子鄉試癸未成進士以二甲序應外任大學士方岳貢見其策論竒之曰此不世才也擬館選內用部覆未下值國變倉皇南奔瀕死燕齊展轉塗乞達南京上書陳時政言甚激切爲時相馬阮所阨以資授廣東萬州知州視事年餘天兵南下金陵福建相繼陷沒桂王由榔稱號肇慶授應斗監察御史未任改吏部驗封司耶中調銓選司郎中加太常寺卿時劉承允劫遷桂王於武岡驕蹇跋扈擅權亂

政應斗度力不能與之爭喟然曰大事已去無能爲也卽告終養去灌園自給敝衣垢履日荷耒鍤雜販豎耕作屢遭刼禍僅以身免

國朝三徵不起應斗少聰慧有至性剛介簡澹寡交遊與弟應星友愛最篤歸田後誅茅威溪之口日相唱和饗殮不給晏如也好讀書爲古文詞類歐玉高潔有法詩亦不苟作所著有白石山史評補雲山別志武岡圖經武岡州志允孚堂文集詩集大來堂制藝等書多佚史評補鄉會墨制藝乾隆中有刻本應星自有傳

武岡州志

卷二十二

列傳

十一

志曰劉敬剛毅有守不爲勢家所屈真不愧御史哉林璧巡按四川陳定蜀六事一夔巡視長蘆陳鹽法十二事皆見諸施行垂爲令甲其所建白殆不誣矣應斗生逢厄運當危亡板蕩之餘間關展轉流涕上書一厄於權奸再制於驕帥卒之飄然遠引泉石銷聲詩言明哲易曰知幾君子以之乃其心亦良苦矣武岡先達前曹後潘皆以賢著然而應斗所處難矣

于李陳蕭二張傳

于子仁字伯安生有夙慧聰穎異常七歲自塾歸有道士

摩其頂曰是兒太狡獪勿惡作劇當現宰官身子仁笑應之道士倏不見州牧白素知其非常兒也延入署與子共讀遂通諸經爲文操筆立就舉洪武甲子鄉試乙丑聯捷成進士授參幕府庶吉士出知山東昌樂縣有異術多神政縣有寡婦子死於虎婦訴於縣子仁命卒持牒入山捕虎卒泣辭子仁曰第焚此牒山中虎自來耳卒入山焚牒羣虎奔集弭耳帖尾隨卒入城集庭下子仁判曰非食婦兒者出犯者伏階下衆咆哮出一虎蹲匍不敢動子仁曰若食婦兒乎殺人者死今赦汝代兒養婦可乎虎掉尾乞

憐縱之去自是每旦虎必啣麀免致婦門夜則臥婦階下儼爲婦子云遷守登州以道遠不能迎母每夜中騎竹杖馳歸省母旦復還率爲常一日偶晏起杖仆於道遂不能返坐離次論死械繫至京百姓詣闕保畱弟子禮亦請以身代遂得釋復任學士茶陵劉三吾與友善有送子仁再任昌樂詩或云子仁坐妖術逮治瘐死獄中以尸解法逃歸爲怨家所告遂不知所終子仁幼敏慧讀書州署時偶出遊見分秧者州守以稻草縛秧翁抱子七字屬對子仁應聲曰竹籃載笋母攜兒其穎敏類此晚號七十一雲峯

道人著有七十一雲峯詩草多散佚今存登泰山歌海門行數篇辭翰遒逸可觀弟子禮自有傳

李暄洪武初恩貢官工部員外郎性剛毅不撓以言事謫經歷宣德初起知松江府宣宗召對稱旨甚嘉其能歷官有善政不喪所守時有李顯者亦以歲貢官宿松知縣以戇直著歸橐蕭然

陳實宣德乙卯舉於鄉性廉謹正統中歷官刑部郎中每歲清理積牘平反以數十計出知鎮遠府邊俗鄙悍率相仇殺實以禮化之爲講求婚嫁祭葬一切儀制俗爲之變

武岡州志

卷二十二

列傳

十三

民多德之祀鄉賢

蕭宏字克俗天順己卯舉於鄉官上虞知縣性剛直言論侃侃不阿上虞故多豪族率以事持縣官短長宏捕得黠者嚴置之法豪貴斂戢自奉儉薄敝衣粗糲而能恫恤民隱罷官後妻子至無以自存饑餓相守宏處之澹如也上虞民立專祠祀之後有添萱者亦宏族也萬歷中尉富平富平民李盡新豪室也諸子以析產構訟歷年不決大吏檄添萱案覆之添萱爲牒召盡新族人諭以大義爲均其產兄弟感服盡新持斗金致謝添萱怒曰爾以我官小可

利動耶峻拒之大吏嘉其廉能遷鳳翔主簿卒於官富平民立祠祀之同時黃輅亦以天順壬午鄉試歷官定遠知縣以清介爲民所愛戴遷合州知州未赴卒蕭宏與林璧黃琬同舉於鄉皆祀鄉賢璧琬自有傳

張能永樂朝恩貢父懋洪武中以歲貢歷官光祿寺典簿思明府同知能性方嚴明決不惑於陰陽襍祥之說宣德中官碭山知縣縣有厲鬼爲民崇居人立廟祀之縣官至必躬詣致祭牲醴狼籍否則立能禍人前令奉事惟謹惴惴恐獲罪能至吏以例祭白能曰爲守土吏而不能與鬼爭何以治人立焚其廟怪遂絕以方正寡合爲大吏所阨休致歸

武岡州志

卷二十二

列傳

十四

張述舉正統甲子鄉試官建川州知州性明斷有治才履任數月囹圄一空遷寶寧府同知歸田後捐置義田敦行不怠祀鄉賢後以鄉舉官同知者有周承恩亦以賢稱歷官如臯知縣屢遷遵義湖州延安府同知所至皆有循聲性肫篤古樸歸里後杜門掃跡有如布素承恩字明揚舉萬歷甲午鄉試

志曰子仁牒虎騎竹事以余所見登州志一統志及稗

史別記所載畧同或且疑之余不謂然漢之樂巴唐之李泌不以神仙鬼怪累其功名又寧僅葉縣之舄葛陂之杖驚人耳目也古人精能之至可役鬼神其事甚竒其理甚常也李暄而下皆起家鄉薦歷膺民牧官雖不顯殆皆有本末足觀云

國朝劉文徽夏益進傳

劉文徽字淑菴舉乾隆戊子鄉試乙丑成進士辛卯殿試二甲除戶部額外主事補江南司主事歷貴州司員外郎雲南司郎中出知河南府文徽通達治體守河南時首懲

武岡州志

卷二十二

列傳

十五

偃師巨猾奸徒斂戢修周南書院構狄梁公祠求其後裔主祀乾隆癸卯中原大旱赤地千里文徽奉檄河北撫卹晝夜馳數百里首捐重金購米賑濟日詣廠周視又給予老幼棉襦饑民數萬無餒斃者以卓異陞河南糧鹽道豫省餉次舊在衛輝後淇水紆不能濟餉糧艘刨淺阻凍季夏始抵通州文徽至移內黃之楚旺衛洹交暢水勢充裕尅期趲運至德州一夜冰合人以爲神是歲漕運春仲抵通

上聞手詔褒美

命直省漕運以河南爲法嘉慶元年湖北教匪煽亂檄赴信陽羅山堵禦設隘二十餘所上大帥書千餘言又上籌賊四策以疾解任未戒途卒於豫省公廨語詳湘潭張九鉞傳子士拔廣西候補同知十擢刑部河南司員外郎夏益進字雲峯幼跌宕多權謀明習法律以入貲歷官直隸靜海縣主簿大城縣縣丞善捕緝每獲盜輒與之寢食能以情句稽其黨與出入以故所獲獨多屢遷并陘良鄉知縣良鄉爲畿輔首縣時川楚用兵軍書絡繹相望於道尤繁劇難治益進晝駐驛舍夜治官書咄嗟立辦邑無廢

武岡州志

卷二十二

列傳

十六

事大吏共稱其能屢檄辦

行在大差以勤慎著聞性戇直官并陘時

駕幸熱河益進承辦

御道向例設正副二道委官監視率以意爲可否獨益進所辦無可訛某王者先驅至由正道進益進阻之不聽乃以兩手控王馬厲聲曰王敢踐

天子道耶王怒甚竟無如何卒反轡由副道出貴官某家奴有所求不得以事相凌踏益進命左右繫之奴聞聲潛遁去其強項類如此以憂去起官山東德平縣德平尤刁

悍難治益進持之急卒爲部民誣詰事白旋以疾卒於官
子夢鯉官知縣

武岡州志

卷二十二

列傳

十七

武岡州志卷二十二